

# Anc constattan las cifras

Barbara Janom Steiner ha discurrì dad in resultat solid per l'onn 2016

■ (anr/ac) L'adattaziun da la valur dals certificats da participaziun da la Banca chantunala ha procurà per in minus en il quint statal dal chantun Grischun. Sin il binari impurtant da las finanzas chantunalas, la operativa, ha il chantun nudà in gudogn da 16 milliuns francs per l'onn 2016. La cussegliera governativa Barbara Janom Steiner ha preschentà las cifras la mesemna passada a Cuira.

La cussegliera governativa Barbara Janom Steiner ha discurrì a chaschun da la preschentaziun dal quint statal dal chantun Grischun la mesemna passada a Cuira dad ina tschentada sin il punct. Ella ha fatg attent al deficit nudà en il preventiv da 56 milliuns francs ed al minus da 51,5 milliuns francs nudà en il quint 2016. La tschentada sin il punct è plitost d'attribuir a la casualità che a las stentas da calcular da l'administraziun da finanzas dal chantun Grischun. La ministra da finanzas è sa chapescha cunscenta da quai. In motiv da la tschentada sin il punct èn ils certificats da participaziun da la Banca Chantunala Grischuna en possess dal chantun che han pers valur e procurà per ina dischvalitaziun en ils cudeschs da la cudeschaziun chantunala dad 86,9 milliuns francs. Paregliabel a la dischvalitaziun da las azias da la Repower dals onns passads. Quellas han ina ulteriura giada pers valur e contribuì uschia al minus da la valur en la cudeschaziun cun 4,5 milliuns francs. Percunter è la valur da las azias da la Ems Chemie Holding SA creschidas per 19,2 milliuns francs.

## La part operativa noda in plus

«Nus essan anc el plus.» Janom Steiner ha visà al plus dal quint operativ che no-



Barbara Janom Steiner e ses collaboratur ha pudì preschentar in gudogn operativ mudest per l'onn 2016.

FOTO Y. BÜRKL

da in surpli dad entradas da 16 milliuns francs ed ha discurrì dad in resultat solid. L'Administraziun da finanzas dal chantun aveva budgetà in minus da 56 milliuns francs. Sin il stgalim dal maneschi è il resultat per 68,9 milliuns francs meglier che la prognosa dal preventiv. La cussegliera governativa ha fatg attent

ch'i saja reussì al chantun da tegnair a mistregn ils custs e quai grazia a consequenta controlla da las expensas. Da la vart dals custs ha il chantun pudì surpassar las prognosas dal preventiv per 61,4 milliuns francs e da l'autra vart èn las entradas creschidas per 7,5 milliuns francs. Vers l'onn precedent è il gudogn

operativ 2016 tuttina per bunamain 44 milliuns francs pli bass. Tenor las explicaziuns da la ministra da finanzas han divers motivs contribuì a la digren dal gudogn 2016 vers quel da l'onn 2015. Ella ha menziunà la nova gulivaziun da finanzas tranter chantun e vischnancas. Lu la cumpart al gudogn

da la Banca Naziunala Svizra, per la mesadad pli pitschen en il 2016 ed a la summa sa sminuida per il chantun Grischun nà da la gulivaziun da finanzas interchantunala.

## Vinavant autas investiziuns

Il chantun Grischun vul vinavant esser in fidaivel partenari da la economia grischuna. L'onn precedent han las investiziuns nettas dal chantun cuntanschì ina summa da 207 milliuns francs. Brutto è culads 356 milliuns francs en l'economia grischuna e quai en furma da contribuziuns 173 milliuns francs, vias 121 milliuns francs, construcziuns autas 32 milliuns francs per numnar ils secturs ils pli principals. La gronda part da las expensas chantunalas va a favur dal traffic (19%), scolaziun (18%), segirtad sociala (17%) e sanadad (13%). Gist tar ils secturs da sanadad e segirtad sociala creschan las expensas annualmain per tschintg procent.

Enfin l'onn 2020 na quinta la cussegliera governativa betg cun considerablas midadas en il quint statal dal chantun Grischun. Uschia ha ella visà ad in pussaivel quint gulivà per l'onn 2017. Diversas malsegirtads ha Janom Steiner menziunà a partir da l'onn 2020, sco la novaziun gist discutada tar la gulivaziun da finanzas federala che duai distgargiar ils chantuns che pajan e la discussiun davart ils novs tschains d'aua. Quellas perspectivs han intimà la regenza da laschar examinar las structures financialas dal chantun Grischun per esser pront.

La filosofia principala per cas che las entradas dal maun public tschessan. En emprima lingua spargnar.